

Waor of niet waor ?


Dick van Bloemendaal, Tekening Gerard Schut

Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Veur julie un vraag, mar veur mien un weet, welke wel of niet waor bin.

De jonker en de boer

An de van Eeghenlaon woonde jonker Ritzuma in un machtig mooi huus mit un hele breeje oprit en un smeediezeren hek dur vur. Ut was un heel aordige keerl die un bedrijf in Amersfoort had mit wel hoenderdvvuufstig man warkvolk. Hie was één van de weinige minsen in ons darp die in die tied un automobiel had en daormee ree hie altied 's marges naor Amersfoort en 's avuns weerum naor Putten. Zo of en toe wou hie zun zinnen wel us verzetten en dan jeug hie mit un knappe vaort langs 's heren wegen.

Op un mooie 's leintese zaoterdagmiddag jeug hie aordig hard over de Kruushaorseweg bie de boerderie van Gaart Knoppers langs en daar loopt krek un koppel kiepen langs de wegkant te scharrelen en te scheumen.



Van schrik vliegen die beesten al kakelend alle kanten uut en de jonker stopt um te kieken wat of dur gande is en wat of hie het an'ericht. Gaart zat net mit zun vrouw Cornelia un bakje thee te drinken in ut bakhuus en toen hie

dat gekakel van de kiepen heurde vleug hie drekt naor buuten en ziet overal kiepeveren deur de lucht vliegen en ok valt zun oog op de auto van de jonker. Hie spreek de jonker dur op an en deze is geliek bereid um de schaoi te betaolen. "Nou", zeit Knoppers tegen de jonker, "van die beesten krieg ik nooit un ei, dat kost je vuuf en dartig gulden".

De jonker trekt zun knip los en betaolt mit gulle hand de boer dat geld want volgens ut principe van de jonker mos dur geliek betaold worren. Daornao stapt jonker Ritzuma op zun auto of en terweil hie instapt zeit hie nog tegen de boer "ik hoop dat ze gauw weer an de lig bin en je weer eier van ze maggen rapen". Mit un schalks lachje zeit de boer "Ik krieg van disse beestjes nooit eier want ut bin allemaol haonen" en hie steekt die vuuf en dartig gulden in de zak van zum mesjesterse broek. Zo zie je mar weer dat un eerlijke jonker zun centen makkelijk kwiet raakt en un gewiektste boer overal geld uuthaolt.

+++